

四庫全書

子部

欽定四庫全書

子部

玉海卷七十六

詳校官給事中_臣查善長

主事_臣祁韻士覆勘

總校官進士_臣朱 鈐

校對官編修_臣沈清藻

謄錄監生_臣姜也魯

欽定四庫全書

玉海卷七十六

宋 王應麟 撰

禮儀

耕藉

武王耕藉

樂記武王云云耕藉然後諸侯知所以敬五者天下之大教也注藉田也

周王藉

禮甸師

下士一人府一人胥三十人徒二百人

掌帥其屬而耕耨王藉以

時入之以共齎盛注王以孟春躬耕帝藉䟽藉田之穀

衆神皆用獨言帝藉舉尊言之 內宰上春詔王后帥

六宮而生種秬之種獻之於王注古者使后宮藏種以

其有傳類蕃孳之祥必生而獻之示能育之使不傷敗

以佐王耕事共禘郊也鄭司農云先種後孰謂之種後

種先孰謂之秬王當以種於藉田 舍人以歲時收種秬

之種以共王后之春獻種 廩人大祭祀則共接盛注
藉田之收藏於神倉者不以給小用 䟽此即廩人兼掌
御廩所藏藉田之收者 詩載芟春藉田而祈社稷箋
藉田甸師氏所掌王載耒耜所耕之田天子千畝諸侯
百畝藉之言借也借民力治之故謂之藉田 䟽王一耕
之而使庶人芸茅終之是借民者謂借此甸師之徒也
萬民之業以農為本五禮之事唯祭為大以天子之貴
親執耒耜所以勸農業也祭之所奉必用已力所以敬

明神也周公成王之時耕藉以勸下民 臣工嗟嗟保

介維莫之春亦又何求如何新畝箋保介車右也月令

孟春云云 記祭義天子為藉千畝冕而朱紘躬秉耒

諸侯為藉百畝冕而青紘躬秉耒 祭統天子親耕於

南郊以共齎盛諸侯耕於東郊注東郊少陽諸侯象也

疏王藉田於遠郊藉田並在東南故王言南諸侯言東

月令孟春天子乃以元日祈穀於上帝乃擇元辰天

子親載耒耜措之於參保介

農官之副也

之御間帥三公九

卿諸侯大夫躬耕帝藉天子三推三公五推卿諸侯九

推反執爵於大寢三公九卿諸侯大夫皆御命曰勞酒

注謂以上辛郊祭天也春秋傳曰郊祀后稷以祈農事
啓蟄而郊郊而後耕元辰蓋郊後吉辰也帝藉為天神
借民力所治之田也既耕而宴飲以勞羣臣也大寢
路寢正義曰陰陽式法正月亥為天倉故耕用亥季

秋乃命冢宰舉五穀之要注定其租藏帝藉之收於神

倉祇敬必飭注重粢盛之委也藏
祭祀之穀為神倉左傳桓十四年八

月御廩災注御廩藏公所親耕
以奉粢盛之倉也昭十八年鄙人藉稻注

自出耕履行之服哀十七年衛藉圃注藉田穀梁傳

度云耕種於藉田三

甸粟而內之三宮三宮米而藏之御廩疏諸侯夫人三

宮

公羊傳云築盛委所藏也

白虎通耕於東郊東方少陽農事始

起桑於西郊西方少陰女功所成故曾子問曰天子耕東田而三反之

周藉禮

周語宣王不藉千畝虢文公諫曰民之大事在農上帝之粢盛於是乎出故稷為大官古者大史順時視土陽

瘳憤盈土氣震發農祥晨正

房星

日月底於天廟

營室孟春之

月土乃脉發

農書曰春土冒振陳根可拔耕者急發

先時九日太史告稷

曰自今至於初吉陽氣俱炆土膏其動稷以告王曰史

帥陽官

春官

以命我司事曰距今九日土其俱動王其祇

祓監農不易王乃使司徒咸戒公卿百吏庶民司空除

壇於藉命農大夫

田畯也

咸戒農用先時五日瞽告有協

風至王即齊宮王乃淳濯饗醴及期鬱人薦鬯犧人薦

醴王裸鬯饗醴乃行百吏庶民畢從及藉后稷監之膳

夫農正陳藉禮大史贊王王敬從之王耕一墪

一耜之墪也王

無耦以班三之一

下各三其上也公三卿九大夫二十七

庶人終于千畝其

后稷省功大史監之司徒省民大師監之畢宰夫陳饗

膳宰監之膳夫贊王王歆大牢班嘗之庶人終食是日

也瞽帥音官以省風土廩於藉東南鍾而藏之

廩御廩一名神

倉而時布之於農稷則徧戒百姓紀農協功曰陰陽分

布震雷出滯土不備墾辟在司寇乃命其旅曰徇農師

一之農正再之云云宗伯九之王則大徇耨獲亦如之

民用莫不震動恪恭於農脩其疆畔日服其耨不解於

時 魯語曰入監九御使潔奉禘郊之粢盛 楚語王

后必自舂其粢天子親舂禘郊之盛 公羊注天子親

耕東田千畝諸侯百畝

漢開藉田 親耕禮儀 耕鉅定 弄田 耕

上林 藉田令

紀文帝二年春正月丁亥詔曰夫農天下之本也其開

藉田朕親率耕以給宗廟粢盛民謫作縣官及貸種食

未入未備者皆赦之

應劭曰古者天子耕藉田千畝為天下先藉者帝王典籍之常

也韋昭曰藉借也借民力以治之以奉宗廟且以勸率天下使務農也臣瓚曰景帝詔曰朕親耕后親桑為天下先本以躬親為義不得以假借為稱也藉為蹈藉也師古曰瓚說是也國語曰宣王不藉千畝虢文公諫則藉非假借明矣九月詔曰農者天下之本也民所恃以生也

而民或不務本而事末故生不遂朕憂其然故今茲親率羣臣農以勸之其賜天下民今年田租之半十二年三月詔曰道民之路在於務本朕躬率天下農十年於今而野不加辟歲一不登民有饑色是從事焉寡而吏未加務吾詔書數下歲勸民種樹而功未興是吏奉吾

詔不勤而勸民不明也且吾農民甚苦而吏莫之省將
何以勸焉其賜農民今年租稅之半又曰孝悌天下之
大順也力田為生之本也三老衆民之師也廉吏民之
表也朕甚嘉此二三大夫之行今萬家之縣云無應令
其遣使者勞賜三老孝者帛人五匹悌者力田二匹廉
吏二百石以上率百石者三匹及問民所不便安而以
戶口率置三老孝悌力田常員各令率其意以道民焉
十三年春二月甲寅詔曰朕親率天下農耕以供粢盛

皇后親桑以奉祭服其具禮儀六月詔曰農天下之大

本務莫大焉今廩身從事而有租稅之賦是本末者無以異也其於勸農之道未備其除田之租稅景帝後

二年四月詔曰朕親耕以奉宗廟粢盛為天下先三年

正月令郡國勸農桑

武帝策董仲舒曰朕今親耕藉田以為農先

武帝征

和四年三月上耕於鉅定

應劭曰齊國縣也水經注作巨定

昭帝始

元元年春二月己亥上耕於勾盾弄田

應劭曰帝時九歲未能躬耕帝

藉鉤盾宦者近舍故往試耕為戲弄也臣瓚曰西京故事弄田在未央宮中師古曰弄田謂游宴之田天子所

戲弄耳非為昭帝
年幼創有此名
始元六年春正月上耕於上林
百

官表大司農屬官有藉田令丞

通典宋志漢文帝初立藉田置令丞

食

貨志文帝即位躬修儉節思安百姓時民近戰國背本
趨末賈誼說上曰毆民歸之農皆著於本則蓄積足而
民樂上感誼言始開藉田躬耕以勸百姓
禮志郊祀
歌玄冥六籍歛之時掩收嘉穀注謂收藉田也
東方
朔傳爰叔曰顧成廟遠無宿宮又有萩竹藉田
後漢
陳忠傳藉田之耕起於孝文

漢親耕祈農 耕定陶 下邳 懷 藉田倉

後漢紀明帝永平四年春二月辛亥詔曰朕親耕藉田以祈農事比再得時雨宿麥潤澤其賜公卿半奉有司

勉遵時政務平刑罰

注禮記曰天子親耕於東郊為藉千畝冕而朱紘躬秉耒耜五經要

義曰天子藉田供上帝之粢盛所以先百姓致孝敬也藉蹈也言親自蹈履於田而耕之十三年春

二月帝耕於藉田禮畢賜觀者食十五年二月癸亥帝

耕於下邳 章帝元和二年二月乙丑帝耕於定陶詔

三老孝悌力田賜帛人一疋勉率農功三年正月辛丑

帝耕於懷 禮儀志正月始耕晝漏上水初納執事告

祠先農已享耕時有司請行事就耕位天子三公九卿

諸侯百官以次耕力田種各耰訖有司告事畢是月令

曰郡國守相皆勸民始耕如儀諸行出入皆鳴鐘皆作

樂其有災眚它故若請雨止雨皆不鳴鐘不作樂注春

秋釋病曰漢家郡守行大夫禮鼎俎邊豆工歌樂縣何

休曰漢家法陳師置守相故行其樂也賀循藉田儀曰

漢耕日以太牢祭先農於田所春秋傳曰邠人藉稻杜

預注曰鄙人藉稻其君自出耕履行之漢舊儀曰春始東耕於藉田官祠先農先農即神農炎帝也祠以太牢百官皆從種百穀萬斛乃立藉田倉置令丞以給祭天

地宗廟羣神粢盛

古為甸師縣邑常以乙未日祠先農
晉志漢儀縣邑以乙日祀先農乃耕

於乙地

黃瓊傳自帝

順帝

即位不行藉田之禮瓊上疏奏

曰先王制典籍田有日司徒咸戒司空除壇先時五日有協風之應王即齊宮享醴載耒重之也書奏從之

東京賦農祥晨正土膏脉起乘鸞輅而駕蒼龍介馭間

以剡耜躬三推於天田修帝藉於千畝供禘郊之粢盛

必致思乎勤已注為天神借民力於此田故名帝藉田

在國之辰地

藉田賦注引應劭漢官儀曰天子耕於壇舉耒三推漢官儀天子升壇公卿耕記

魯夫下種凡稱藉田為千畝亦曰帝藉耕藉東耕親耕王藉

輿服志芝車上親耕

所乘注東京賦曰農輿路

輅木賀循曰漢儀親耕青衣幘

漢藉田歌辭

齊樂志藉田歌辭漢章帝元和元年玄武司馬班固奏

用周頌載芟祠先農晉傳玄作祀先農先蠶夕牲歌詩

一篇八句迎送神一篇饗社稷先農先聖先蠶歌詩三篇前一篇十二句中一篇十六句後一篇十二句辭皆叙田農事胡道安先農饗神詩一篇並八句樂府相傳舊歌三章永明四年藉田詔江淹造藉田歌二章付太樂歌之羽鑿從動金駕時遊率先丹耦躬遵綠疇瓊竿旣飾繡簋以陳方燮嘉種永毓宵民

魏耕藉

晉志魏三祖皆親耕闕諸侯百畝之禮

通典同

明帝太

和九年二月辛未耕藉田五年正月耕藉田 繆襲許
昌宮賦太和六年春上既躬耕帝藉發趾於千畝以帥
先萬國乃命羣牧守相述職班教順陽宣化是歲甘露
降方內豐穰穆乎有太平之風勅羲仲以農期儀晨祥
而舉趾 曹植藉田論春耕藉田謂郎中令曰營疇萬
畝厥田上上經以大陌帶以橫阡此寡人之封疆也

左太沖魏都賦藉田以禮動大閭以義舉注建安二十
一年三月壬寅魏武帝親耕藉田於鄴城東

十九年正月
始耕藉

田

晉耕藉田

賦

藉田令

晉志禮孟春之月天子躬耕帝藉漢文帝始行斯禮魏之三祖亦皆親耕及武帝泰始四年詔曰古之聖王躬耕帝藉以供郊廟之粢盛且以訓化天下近世以來耕藉始於數步之中空有慕古之名曾無供祀訓農之實而有百官車徒之費今修千畝之制當與羣公卿士躬親稼穡之艱難以帥先天下主者詳具其制下河南處

田地於東郊之南洛水之北於是乘輿御木輅以耕以

大牢祀先農

江左元帝將修耕藉事竟不行

宋志云賀循等

上注哀帝欲行此典亦不能遂

興寧二年欲藉田江甯謂儀注不存中興以來所不

行宜停之哀紀二月癸卯親耕藉田

紀武帝泰始四年春正月丁亥

帝耕於藉田戊子詔方今陽春養物東作始興朕親率

王公卿士耕田千畝將以務本惠育海內其大赦天下

八年正月癸亥十年正月辛亥耕於藉田十二月置藉

田令食貨志是時江南未平朝廷厲精於稼穡泰始

四年帝親耕藉田詔曰使四海之內競務農功者唯郡縣長吏乎 潘岳傳泰始中武帝耕藉田岳作賦以美

其事曰伊晉之四年正月丁未

注云丁未誤

皇帝親率郡后

藉於千畝之甸禮也甸師清畿野廬掃路封人墮宮掌舍設柷青壇尉其嶽立翠幕黝以雲布遐旰繩直邇陌如矢葱牂服於縹輶紺轅綴於黛帑前驅魚麗屬車鱗萃閭闔洞啓參塗方駟常伯陪乘太僕執轡后妃獻種棿之種司農撰播殖之器降靈壇撫御耦三推而舍庶人

終畝貴賤以班或五或九思樂旬畿薄采其茅大君戾

止言藉其農

臧榮緒晉書曰司空掾潘岳作藉田頌

杜預傳拜度支尚

書乃奏立藉田

有司奏御牛青絲繩斷詔以青麻代

之

晉藉田官

溫嶠傳明帝時奏軍國要務其五日古者親耕藉田以
供粢盛舊置藉田廩犧之官今臨時市求非所以虔奉
宗廟宜如舊制立此二官 宋志藉田令丞晉武太始

十年復置江左省宋元嘉中又置

宋藉田 梁望耕臺

宋元嘉二十年十二月壬午置藉田使何承天撰定儀注史學生山謙之鳩集以奏於是造定圖注先立春九日度宮之辰地八里之外制千畝立先農壇於中阡西陌南御耕壇於中阡東陌北將耕宿設青幕於耕壇之上孟春吉亥乘耕根三蓋車駕蒼駟青旂服青袞佩蒼玉親耕二十一年正月辛酉親耕元嘉二十二年六月

嘉禾生藉田一莖九穗二十三年七月乙丑嘉禾生藉

田藉田令褚熙伯以聞二十六年六月甲寅嘉禾生二

十五年六月壬子嘉禾生

大明四年泰始元徽皆行是禮任豫徐爰有賦堯心禹

勤

齊永明四年閏正月辛亥親耕

詔江淹造藉田歌二章

梁

天監十三年二月丁亥以啓蟄而耕

十六年二月辛亥耕普通二

年四月丙辰徙藉田於東郊外十五里

建康北岸築北域如

南北郊別有望耕臺在壇東親耕畢登此臺以觀公卿

之推又有祈年殿四年二月乙亥躬耕賜爵勞酒

中大通以

後耕藉者八
帝有藉田詩

陳大建元年二月乙亥三年二月丁酉

六年二月辛亥九年二月壬午十一年二月癸亥十三

年二月乙亥耕藉田凡六 後魏太武天興三年二月

丁亥祀日東郊始耕藉田祭先農孝文延興二年三月

庚午耕太和十七年二月乙丑耕藉田於平城南宣武

景明四年正月乙亥藉千畝孝明正光三年正月辛亥

親耕 北齊藉於帝城東南作祠壇四陞三壇四門設

御耕壇於阡東陌北天保二年正月辛亥耕 後周閔

帝元年正月癸亥明帝二年正月辛亥武帝保定元年

正月乙亥天和元年正月己亥二年正月己亥建德三

年正月乙亥親耕 隋制於國南十四里啓夏門外置

壇播植九穀納乎神倉以擬衆盛 江總勞酒賦遵執

爵之典降食革之燕奏帝鴻之萬舞動鈞天之九變

齊永

明四年正月甲寅藉田畢幸閔武堂勞酒小會賜帛

齊志何譔之議鄭注云元

辰蓋郊後吉亥也何佟之議丁亥自是祭祀之日不專

施於先農漢文用此日耕藉祠先農故後王相承用之

顧暉之議昭帝巳亥耕弄田明帝癸亥耕下邳章帝乙丑耕定陶又辛丑耕懷魏之烈祖實書辛未不繫一辰

梁藉田省

隋禮志大同五年又築雩壇於藉田兆內有祈禱則齋官寄藉田省云 紀普通二年四月丙辰詔曰平秩東作義不在南可於震方具茲千畝

唐藉田 藉田壇 享先農 先農壇 藉田

頌

紀貞觀三年正月癸亥耕藉田 永徽三年正月丁亥

耕藉田 儀鳳二年正月乙亥耕藉田 先天元年正

月戊子唐宗幸漣東耕藉田己丑大赦改元太極 開元

十九年正月丙子耕於興慶宮龍池親耕三百餘步

開元二十三年正月乙亥耕藉田大赦賜勲爵 乾元

二年正月戊寅耕藉田 禮樂志皇帝孟春吉亥享先

農遂以耕藉前享一日奉禮設御座於壇東西向又設

御耕藉位於外壇南門之外尚舍設御耒席皇帝已享

乃以耕耨車載耒耜於御者間皇帝乘車自行宮降大
次乘黃令以耒耜授廩犧令皇帝出就耕位廩犧令解
韜出耒司農卿進受之以授侍中奉以進皇帝受之耕
三推皇帝初耕執耒者皆以耒耜授侍耕者皇帝耕止
三公諸王耕五推尚書卿九推皇帝還入大次太常卿
帥其屬耕於千畝皇帝還宮明日頒勞酒於太極殿如
元會不賀不為壽藉田之穀歛而鍾之神倉以擬粢盛
及五齊三酒穰藿以食牲藉田祭先農唐初為帝社亦

曰藉田壇貞觀三年太宗將親耕給事中孔穎達議曰

禮天子藉田南郊諸侯東郊今帝社乃東壇未合於古

太宗曰書稱平秩東作而青輅黛耜順春氣也五方位

少陽田宜於東郊乃耕於東郊垂拱中武后改藉田壇

曰先農壇

高五尺周四十步者先農之壇

神龍元年禮部尚書祝欽明

議曰周頌載芟春藉田而祈社稷禮天子為藉千畝諸

侯百畝則緣田為社曰王社侯社今曰先農失王社之

義宜正名為帝社太常少卿韋叔夏博士張齊賢等奏

經無先農禮曰王自為立社曰王社先儒以為在藉田也永徽中猶曰藉田垂拱後乃為先農與社一神今先農壇請改曰帝社壇以合古王社之義其祭准令以孟春吉亥祠后土以勾龍氏配於是立帝社壇又立稷壇於西如大社大稷而壇不設方色以異於太社開元十九年停后稷祀神農氏於壇上配以后稷二十三年親祀神農於東郊配以勾芒遂躬耕盡隴止肅宗乾元二年詔去耒耜雕刻命有司改造之

曰田器朴素宜貴文飾

天子出

通化門釋輶而入壇遂祭神農氏以后稷配冕而朱紘躬九推焉 舊紀乾元二年正月戊寅有事於藉田

通鑑

乙卯耕藉田

上行九推禮官奏太過曰朕勸農率下所恨不

終千畝耳禮畢雪盈尺 會要貞觀三年正月十八日

詔曰今將履千畝於近郊復三推於舊制二十一日親

祭先農藉於千畝之甸自晉南遷此禮久廢今始行之

觀者駭躍祕書郎岑文本獻藉田頌以美之

頌曰憲章戴記殷鑒

周宣迴輿南畝駐蹕東廡

永徽三年正月二十九日丁亥親享先農

躬御耒耜率公卿耕於千畝之甸

舊紀賜羣官帛

景雲三年

先

天元年

正月十八日戊子親耕於藉田己丑改元太極開

元二十三年正月十八日親祀先農禮畢降至耕位侍

中執耒太僕秉轡上謂左右曰帝藉之禮古則三推朕

今九推庶九穀之報也其年十一月十六日親祀神農

於東郊以后稷配親執耒耜而九推焉

六典注開元二十三年正月

親耕於洛陽東門外時學士王仲邱請行藉田之禮

唐藉田賦

會要儀鳳二年正月乙亥

十一日

親耕藉田於東郊禮畢

作藉田賦以示羣臣三年五月幸藉田所觀區種手種

數區祭先農樂章三奏豐和之舞二變顯慶三年洗

馬郭瑜撰

唐藉田儀注

會要開元二十三年正月敕中書令張九齡光祿卿韋

紹與禮官就集賢院撰藉田儀注通典開元二十三

年二月祀先農畢躬秉耒耜於千畝之甸時有司進儀

注天子三推公卿九推庶人終畝 玄宗欲重勸耕藉
進耕五十餘步其儀備開元禮

唐元和藉田東郊儀

志憲宗元和五年詔以來歲正月藉田太常修撰韋公
肅言藉田禮廢久矣有司無可考乃據禮經參采開元
乾元故事為先農壇於藉田高五尺廣五丈四出陞其
色青草具其儀以水旱用兵而止 會要元和五年十
月丁亥詔取來年正月十六日東郊藉田勅有司修撰

儀注十一月九日丙午停藉田 韋公肅傳元和初憲

宗將耕藉詔公肅草具儀典容家善之

五年以河朔師旅之後物力彫

耗將行而止

雍熙藉田耒耜

雍熙四年十一月四日禮儀使言御耒耜二具并緇並飾以青隹乾元故事其制如農人所執者不加彫飾事

畢內中尚收之載以耕根車

在玉輅前

明道二年藉田有司

求太宗所御耒耜準其制以造作而青綾緇依然如新

於是即用舊縑不復更造二月丁未肆赦首言太宗親

耕耒耜勅有司嚴密祕護以表崇奉之意

實錄云令太僕寺永祕藏

之明道二年正月二十五日大禮使以製成御耒耜青

箱等奏御二月九日齋天安殿翌日乘玉輅適耕所司

農卿以耕根車載耒耜前行十一日祀畢搢圭秉耒三

推侍中前授耒耜於司農卿卿授廩犧令令復耒於縑

以授侍耕者青箱舊無其制用竹木為之無蓋兩頭

設襍飾以青中分九隔隔設一種覆以青帊隋書藉

田令以青箱種耒之種跪呈司農詣耕所曬之唐不行此禮

端拱藉田 藉田儀注 先農壇 觀耕臺

雍熙四年九月二十七日辛巳出御札曰王者上事穹倉下臨黎獻遵執古御今之道推予民育物之心必務穡以勸分庶家給而人足朕嗣守大寶惟懷永圖發一言必念生靈嘗一膳必思稼穡雖燔柴告類紫壇屢薦於至誠而執耒親耕青輅未行於盛禮其以來年正月

擇日有事於東郊行藉田之禮宜令所司詳定儀注以聞是禮廢之久矣制下之日中外歡洽二十八日以宰臣李昉為大禮使陳王元僖為橋道頓遞使翰林學士宋白為禮儀使賈黃中為鹵簿使御史中丞張宏為儀仗使仍命白黃中與蘇易簡詳定儀注十月一本十一月一日

詳定所言按通典乘青輅推黛耜者所以順春氣其方位請在東郊又北齊作壇壇高九尺廣輪三十六尺四陛三壇四門唐制高五尺周迴四十步飾以青今請於

朝陽門七里之外十五里之內擇地為壇壇高九尺周

壝四十步飾以青

特詔設兩壝外壝在大次及御耕位觀耕臺樂縣之外

十五日

禮儀使宋齊言舊禮於先農壇東立觀耕臺帝親耕禮

畢登此臺以觀公卿推請築臺高五尺以便陟降周圍

四十步四出陞飾以青皇帝乘玉輅以耕根車載耒耜

以青箱奉種耒之種從之

十一月二十七日學士院上東郊青城殿門名前殿曰兩

儀後殿曰延慶大殿門曰龍德左掖門曰光天右掖門曰麗天東門曰鳳陽西門曰安福南門曰祈年北門曰

玄英東西廊門曰日華月華後園亭門曰會芳御幄後門曰福慶

五年正月

一本云十五日癸

酉上宿齋於乾元殿甲戌鸞駕出宮備大駕鹵簿於丹

鳳門外帝服通天絳紗執圭乘玉輅次東郊是夜宿齋

室乙亥

十七日

未明三刻帝服袞冕執鎮圭親享神農氏

於壇上以后稷配焉禮畢次詣耕藉位

御耕位在壇門東南

行三

推之禮有司版奏禮畢帝謂侍臣曰朕志在勸農恨不

能終千畝豈止於三推為限乎遂耕數十步侍臣固請

乃止又御觀耕臺南鄉坐觀王公耕訖侍中奏禮畢解

嚴還行宮百官稱賀帝改御大輦服通天絳紗鼓吹振

作而還御乾元門降赦

一作丹鳳樓用采茨之曲升坐用隆安

乘輿至樓前制

曰宣惟備郊廟之粢盛抑亦勵蒸黎之播殖改五年為

端拱元年丙子

十八日

上賦東郊藉田五七言詩各一首

賜侍臣二月七日

會宴

百官於大明殿行勞酒禮甲午

羣臣獻詩賦贊頌者五十三人

其後淳化稼穡有詩踏犂有式淳化元年五

月二十三日禮官請先農壇各封五十步為兩壇壇各五十步

舊制天子孟春吉亥享

先農於東郊親耕藉田晉之南遷此禮遂廢唐貞觀中

太宗始藉千畝至元和五年憲宗以河朔師旅之後物

力彫耗將行而止下歷五代禮廢者二百餘年帝以承

平既久詔酌舊典而行之天下聳然知勸矣

四月二十三日賜耆

老衣帛

王元之上藉田賦曰潘安仁賦於晉岑文本頌於

唐 雍熙三年孔維為司業會將藉田維起周禮至唐書凡沿革制度並錄以獻觀者稱其博

明道藉田

記

儀注 類事

明道二年二月十一日丁未行藉田禮罷冬至郊祀藉田所施一准郊例悉用端拱之制而加損益焉貢舉人

自請陪位許父老縱觀勿令呵止 仁宗皇帝即位十

一年明道元年

歲次壬申

十二月

一本十二月一本正月

庚子

三詔以

來歲仲春涓日行耕藉之禮命有司草具儀辛丑尚書

司封員外郎直集賢院王舉正太常博士直集賢院李

淑與禮官詳定儀注

國史志李淑耕藉類事五卷

七日禮官請就端

拱壇位因加修飾八日請改撰藉田樂章二十二日上

之付太常習肄甲子有司新製耒耜

二十七日學士院撰青城諸門及殿

名正門為崇禮左右為清和厚德正東為寅賓正西為西成後三門為咸寧側門為宜耀延清大殿為受禧之

殿門同名殿前東西門為宣仁章義便殿為含德苑殿為臨芳後園門為凝華

越明年正月

二年

戊寅太史奏用二月十一日丁未行禮直集賢院李淑等上耕藉類事五卷庚辰詔以皇兄建雄軍節度允升攝左衛上將軍蔣國公為祀先農亞獻彰信軍節度觀察畱後允寧攝右衛上將軍萊國公為三獻並攝行五推禮寧國軍節度使駙馬都尉李遵勗等攝行九推禮二月乙亥上御天安門閱大僕寺新置車輅二月丙午上齋宿於東郊日傍有黃氣如龍鳳丁未服袞冕執圭

祀神農后稷於壇乃就耕位耨耒執耒行禮禮儀使張
士遜奏三推而止上曰朕既親耕不以古禮為式願耕
之終畝以勸天下之農士遜奏曰王者三推禮經舊式
皇慈勉勸度越古先請命公卿進耕以循典禮帝曰朕
志在千畝卿等固請遂耕十有二畦而止帝升觀耕臺
南面坐觀公侯等耕王公以下執耒悉過五九之數藉
田令奉種耜之種司農卿受而播之率屬以終千畝帝
受賀於受禧殿還御正陽門大赦天下

肆赦內一條云
太宗皇帝親耕

來報其令太僕寺秘藏之進藉田青牛四下芳林園養之十六日賜

百官福酒有差辛亥上作藉田詩賜近臣已未命宰臣

呂夷簡參政晏殊撰藉田記二十三日四月夷簡殊罷五月

丙子命宰臣張士遜典領翰學馮元編修直史館宋祁

檢討開元故事會要二年二月十一日藉田禮畢御

端拱舊章

天安殿受冊三月二日丁卯設勞酒宴於集英殿庚午

百官加恩宋祁上頌曰丙午之旦次於帷宮淳濯圭潔

昧明乃頓大次歎嘉壇索先農以享之因太稷以配之

乃降靈場儼朱紘紺轅儲駕洪縻序進遂推而進之幾
十墩而後釋乃始弭節容與御觀耕之臺王公羣后班
趨以耨邁五踰九大農灑種庶人終畝 學士院撰享
先農登歌樂章 其後景祐作觀稼殿皇祐作寶岐殿
景祐元年司天監校土牛經書目一卷去其複重釋牛色等
四篇為農事之占十月己巳命知制誥丁度序之敬天
下其牛色及執策者衣並以歲月支干納音相配 前
紹端拱後遺紹興

元豐藉田

圖

先農壇

神倉

儀注

元豐二年

已未歲

十月癸卯詔於京城東南度田千畝為

藉田

置令一員以辛公祐兼

徙先農壇於其中神倉於東南三年

十月庚辰辛公祐請下有司定耕藉儀注增修鑿麥殿

以備行幸

先是五月九日王存等請以南郊鑿麥殿前地及玉津園東南焚地并民田共一千百畝

為藉田外以百畝建先農壇兆開阡陌溝洫建神倉齋宮及耕作人牛廬舍之類繪圖上之詔付禮院

四

年八月壬戌

八日

藉田司言九穀皆稔請修講觀麥視禾

臨幸儀注

詳見後

政和藉田儀注

八年正月辛卯禮制局上藉田儀注 宣和元年正月

乙亥躬耕帝藉

會要二年二月詔曰歲二月己亥躬耕帝藉當攷

紹興藉田 耕藉鹵簿 儀注 觀耕壇

十五年十一月十七日詔以來歲之春祈祓青壇親載
黛耜躬三推之禮以風示於四方從司封郎中李澗之
請也太常討論典故請營建於行宮之南車駕服履袍
乘平輦詣思文殿進膳畢服通天絳紗行親耕之禮耕

藉鹵簿儀仗依政和新儀用六百八十八人閏十一月

六日丁丑兵部太常以地狹請止用其半

用三百四十八

奏

可庚辰

九日

以宰臣檜為耕藉使十六年正月五日禮官

修定親享先農親耕儀注上之二十二日壬辰皇帝袞

冕親享先農行藉田禮推至七至九

一云正月辛酉初藉千畝

二十

五日乙未百官表賀二月四日癸卯詔曰朕親耕藉田

以先黎庶三推復進勞賜耆老嘉與世俗躋於富厚

先是

上曰詔須語簡意足使民曉然知厚本之意

時臨安守張澄設靈壇御耦幄

殿次舍 十五年閏十一月甲申司農薄宋樸請

令守令以歲仲春出郊勞農遂為故事 親耕七

曲出大次至歸大次並用乾安享先農宮架奏靜

安之樂儲靈錫羨之舞三成 給田五百七十餘

畝以備親耕 十五年初除康與之為藉田令三

十一年罷 淳熙元年十月二十七日復置藉田

令 自端拱至紹興親耕者四 紹興十六年正

月五日修定儀注前期於觀耕壇上設御幄南向

設御座於幄內皇帝升觀耕壇宮架樂作 正升

自午階登歌樂作禮畢耕藉使升卯階立御幄前
西向四方館使引陪耕耆老立壇下北向云云皇
帝降座登歌樂作至壇下升輦 祥正而青旗肅

事土膏而朱紘戒典將使杏花芑葉耕獲不愆清
畛泠風述遵無廢 阡陌繡錯原隰龍鱗蒸膏冒

樞協風回春 謹察天廟申勅陽官 悠悠春旗

覲土於畿陽膏澤澤邁於三推 擁耒成林醴流

降雨陽春如膏原隰如鱗我稼既華六合生雲稻
梁黍稷萬井龍文民一于耜家萬斯箱甸師
清畿野廬掃路封人墮宮掌舍設桓青壇嶽立翠
幕雲布后妃獻種稂之種司農撰播植之器御王
輦蔭華蓋金根照耀龍驤沛艾降靈壇撫御耦遊
場染屨洪廩在手三推而舍庶人終畝貴賤以班或
五或九稍變猶以護野雜荆牟以守燎孟春之
帥三公九卿大夫親駕於東郊紺轅黛耜躬御帝藉

三推一塿竣事而旋彌文濶典創見一時民大和會
聞郭謚郭歌謳鼓舞聲聞于天 在豐念置在飫思
饑 炎帝之教后稷之功方我王度明而未融 桂
出椒掖器成大農 瞻榆束耒望杏開田 望朱紘
之光聽鑾輅之音作為歌詩以告成功而繼載芟之
作其必有日矣 千畝之田三推之禮 躬稼以供
粢盛所以致孝也勸穡以足百姓所以固本也能
本而孝盛德大業至矣哉此一役也二美顯焉 史

奉載耜之禮民奏舉趾之歌 千軫風行萬轡霧轉

順動而取諸豫時行而應乎乾 我疆我理必躬必親

農扈允臧 祥鳳發於耒耜瑞雪掩於郊廛 農祥

晨晰土膏初起春原倣載青壇致祀歛蹕長阡迴旌外

墳親事朱紘躬持黛耜 景集天廟脉壤祥農青壇岳

立翠幕煙平百司駿奔三公肅事紺轅黛耜綠耦朱紘

王者必藉千畝庸勸九農載御耦於介間脉陽膏於

廛左借民之力時闕於甫田為神之倉歲儲於馨稷

服黛耜以天臨紉朱紘而身勸本宜一塏遂過九推



玉海卷七十六

欽定四庫全書

子部
玉海卷七十八

詳校官給事中_臣查善長

主事_臣祁韻士覆勘

總校官進士_臣朱 鈐

校對官編修_臣沈清藻

謄錄監生_臣姜也魯

欽定四庫全書

玉海卷七十七

禮儀

親蠶

周中春蠶北郊

禮內宰中春詔后帥外內命婦始蠶於北郊以為祭服

歲終稽其功事

注蠶於北郊婦人以純陰為尊郊必有公桑蠶室焉疏按月令三月后妃親東

宋王應麟撰

鄉躬桑此
云二月

佐后而受獻功者比其大小麤良 大宰九

職嬪婦化治絲枲 典絲掌絲入而辨其物 內司服

王后六服鞠衣注鞠衣黃桑服也色如鞠塵象桑葉始

生月令三月薦鞠衣於先帝告桑事

先帝太昊之屬
為蠶求福也

疏

謂季春將蠶后服之告先帝 巾車翟車注后所乘以

出桑

記月令季春鳴鳩拂其羽戴勝降於桑

蠶將生
之候

具曲植遽筐后妃齋戒親東鄉躬桑禁婦女毋觀省婦

使以勸蠶事蠶事既登分繭稱絲效功以供郊廟之服

注后妃親採桑示帥先天下也
夏小正曰妾子始蠶執養官事
孟夏蠶事畢后妃獻繭

乃收繭稅以桑為均貴賤長幼如一以給郊廟之服

注內

命婦獻繭於后妃收
繭稅者收於外命婦
季夏命婦官染采
祭統王后蠶

於北郊以共純服

亦冕服也

夫人蠶於北郊以共冕服

夫人不蠶

於西郊婦人
禮少變也

祭義古者天子諸侯必有公桑蠶室

公桑猶公

也近川而為之築宮仞有三尺棘牆而外閉之及大昕

之朝君皮弁素積卜三宮夫人世婦之吉者使入蠶於

蠶室奉種浴於川桑於公桑風戾以食之歲既單矣

三月

之末四月初世婦卒蠶奉繭以示於君遂獻繭於夫人遂副

褱而受之用少牢以禮之及良日夫人繅三盆手遂布

於三宮夫人世婦之吉者使繅遂朱綠之玄黃之以為

黼黻文章服既成君服以祀先王先公敬之至也 玉

藻唯世婦命於奠繭注世婦以下蠶事畢獻繭乃命之

疏謂世婦及命婦入助蠶畢獻繭也 魯語王后親織

玄紵公侯夫人加以紃紵社而賦事烝而獻功 孟子

禮曰諸侯耕助以共粢盛夫人蠶繅以為衣服 公羊

注后夫人親西郊采桑以共祭服 禮內宰疏馬質注

天文辰為馬引蠶書曰蠶為龍精月值大火則浴其種

是蠶與馬同氣故此亦仲春始蠶亦謂浴種 詩蠶月

條桑 書禹貢兗州貢絲 穆天子傳甲寅天子作居

范宮以觀桑者乃飲於桑中命桑虞出桑者禁暴民

漢祠先蠶 漢織室蠶 繭館 蠶官

後禮儀志永平二年三月皇后帥公卿諸侯夫人蠶祠
先蠶禮以少牢注丁孚漢儀曰皇后出乘鸞輅青羽蓋

駕駟馬龍旂九旂大將軍妻參乘太僕妻御前鸞旗車
皮軒闔戟雒陽令奉引亦千乘萬騎車府令設鹵簿公
卿五營校尉司隸校尉河南尹妻皆乘其官車帶夫本
官綬從其官屬導從皇后置虎賁羽林騎戎頭黃門鼓
吹五帝車女騎夾轂執法御史在前後亦有金鉏黃鉏
五將導桑於蠶宮手三盆於繭館畢還宮月令曰禁婦
女無觀按谷永對四月壬子皇后蠶桑之日也則漢桑
亦用四月漢舊儀曰春桑生皇后親桑於苑中蠶室養

蠶千薄以上祠以中牢羊豕令蠶神曰苑窳婦人寓氏公主凡二神羣臣妾從桑還獻於繭觀皆賜從桑者樂皇后自行凡蠶絲絮織室以作祭服祭服者冕服也天地宗廟羣臣五時之服其皇帝得以作縷縫衣得以作巾絮而已置蠶官令丞諸天下官皆詣蠶室亦婦人從事故舊有東西織室作法晉后祠先蠶先蠶壇云云

晉見

志

輿服志漢制皇后蠶服青上縹下貴人助蠶服純

縹皇后以蠶衣為朝服 宋志漢東郊非古也魏北郊

依周禮也晉西郊與藉田對其方也 董巴輿服志曰
漢皇后桑於東郊苑中 傅毅洛都賦桑宮繭館區制
有矩后率九嬪躬敕工女

漢親蠶

紀文帝十三年春二月甲寅詔曰朕親率天下農耕以
供粢盛皇后親蠶以奉祭服其具禮儀 景帝後二年
四月詔后親桑以奉祭服為天下先 王莽傳請元后
春幸繭館率皇后列侯夫人桑師古曰漢宮闕䟽上林

苑有繭館蓋蠶繭之所也

後紀明德皇后置織室蠶

於濯龍中

前書有東織
西織屬少府

魏蠶北郊

宋志魏黃初七年正月命中宮蠶於北郊

韋誕親蠶

頌曰嘉柔桑之肇敷思郊廟之至敬命皇后以親蠶俾

躬桑於外垌爾乃皇英參乘塗山奉輿揔姜任於後陳

載樊衛於貳車千乘隱其雷動萬騎粲以星敷登崇壇

以正位覲休氣於朝陽步雕輦而下降手柔條於公桑

嬪妾肅以莅事各奉職而承箱供副禕之六服昭孝敬

於烝嘗

初學記

隋禮志吳韋昭製西蠶頌則孫氏亦有

其禮

晉親蠶

先蠶禮

先蠶儀注

紀武帝太康九年三月丁丑皇后親蠶於西郊賜帛各

差志周禮王后率内外命婦享先蠶於北郊漢儀皇

后親桑東郊武帝太康六年散騎常侍華嶠奏先王之

制天子親耕后夫人躬蠶今蠶禮尚缺宜依古式備斯

盛典

華嶠傳奏修蠶宮之禮

詔曰今藉田有制而蠶禮未修今天

下無事宜修禮以示四海其詳依古典明年施行於是蠶於西郊蓋與藉田對其方也乃使侍中成綰草定其儀先蠶壇高一丈方二丈為四出陛陛廣五尺在皇后採桑壇東南取列侯妻六人為蠶母蠶將生告擇吉日后著十二筭步搖衣青衣乘油畫雲母安車駕六驄馬公主三夫人九嬪世婦內外命婦皆步搖衣青從蠶先桑二日蠶官生蠶著薄上桑日皇后未到太祝令質明

以一太牢告祠皇后至西郊升壇東南躬桑採三條諸
妃公主五條縣鄉君以下九條以授蠶母事訖皇后還
便坐設享宴賜絹各有差 晉元康議曰皇后採桑壇
在蠶宮西南 晉閔鴻有親蠶賦 左芬文亦既青陽
鳴鳩告時躬執桑曲率導媵姬修成蠶簇分繭理絲女
工是察祭服是治祇奉宗廟永言孝思

晉先蠶儀注

後魏禮志阮湛禮圖載秦漢以來輿服云乘輅后法駕

乘之以親桑晉先蠶儀注皇后乘雲母安車駕六驄阮

氏圖桑車亦飾以雲母

宋志晉氏先蠶多採魏法

宋禮

志引晉先蠶儀注

通典載晉先蠶注

初學記引梁先蠶儀注

宋蠶宮

南史宋大明三年十一月甲子立蠶宮於西郊

四年又修此禮

倣晉氏之禮立蠶觀

宋書大明四年皇后率六宮躬桑於西郊

皇太后觀禮詔曰卜祥大昕測辰拂羽爰詔六宮親蠶

川室皇太后降鑒從御佇蹕觀禮綠蘧既具玄紬方修

儀發椒闡化動中縣

北齊為蠶坊蠶宮

隋志周禮

王后蠶於北郊漢法於東郊魏遵周禮於北郊晉太

康六年於西郊依漢故事宋大明四年始於臺城西

白石里為西蠶設兆域置大殿七間又立蠶觀後

周制后乘翠輅至蠶所奠先蠶西陵氏神

自齊周及隋多依晉

儀損
益

唐親蠶

紀貞觀元年三月癸巳皇后親蠶

會要貞觀元年三月十日文德后率內外

命婦有事
於先蠶

顯慶元年三月辛巳皇后親蠶總章二年三

月癸巳皇后親蠶上元元年三月巳巳皇后親蠶二年

三月丁巳天后親蠶祀先蠶於邛山之陽開元元年三

月辛巳

十人日舊紀云辛卯

皇后親蠶乾元二年三月巳巳皇后

親蠶

志皇后季春吉巳享先蠶遂以親桑

隋上巳祭先蠶散

齊三日於後殿致齋一日於正寢一日於正殿致齋之

日尚服率司仗布侍衛司賓引內命婦陪位六尚以下

各服其服詣後殿奉迎皇后服鈿釵禮衣結珮乘輿出

自西房華蓋警蹕降就齋室散齋散齋之日內侍率內命婦之吉者使蠶於蠶室前享二日大樂令設宮縣之樂於壇南內壇之內女工各位於縣後右校為採桑壇於壇南二十步所方三丈高五尺四出陞尚舍量施帷障於外壇之外設御位於壇之東南西向又設御採桑位於壇上東向享日司設升設先蠶氏神座於壇上其日六尚以下詣室奉迎尚服負寶內僕進厭翟車皇后服鞠衣乘輿以出華蓋侍衛警蹕皇后升車尚功奉鉤

司製進筐載之內命婦及六尚等乘車從駕次大次門
外降車停大次半刻頃出次入自東門至版位樂三成
受幣跪奠於神座已奠乃奉毛血跪奠於神座前皇后
復位復升自壇酌醴齊進先蠶氏神座前奠爵尚儀讀
祝文皇后再拜飲福受胙復位尚宮曰禮畢引詣採桑
壇尚功奉金鈎採桑三條止內外命婦以次採至蠶室
尚功以桑按蠶毋蠶毋切之以授婕妤食蠶洒一薄止
車駕還宮之明日內外命婦設會於正殿如元會之儀

命曰勞酒 張后傳親蠶苑中羣命婦相禮儀物甚盛

百官志掖庭局公桑養蠶會其課業 會要永徽三

年三月七日甲子制以先蠶為中祠后不祭則皇帝遣有

司享之如先農 祭先蠶樂章二奏永和之舞顯慶三

年洗馬郭瑜撰 先天二年三月二十八日辛卯皇后親

祠先蠶自嗣聖以來禮廢至是重行 開元十五年五

月上命宮中育蠶丁酉夏至賜貴近絲人一緇 玄宗

以六宮親蠶絲賜近臣崔沔獻御絲賦見顏魯公集

徐彥伯南郊賦

率先金薄之錢
謹覆瑤箱之燕

通典北齊先蠶壇高五尺方

二丈四陛陛各五尺皇后蠶壇高四尺方二丈四
出陛廣八尺隋置壇於宮北三里高四尺唐在長
安宮北苑中高四尺周迴三十步

至道養蠶經

元年馮翊民李元真獻養蠶經一卷五月十九日甲子
上觀之以不忘本業畱書禁中賜錢萬 崇文目淮南
王蠶經三卷孫氏蠶書二卷

景德祀先蠶壇政和親蠶無斁殿宣和

親蠶

景德三年二月

一本二
十一日

丙申資政殿大學士王欽若言

古者皇后親率嬪御以祀先蠶是以開寶通禮郊祀錄並有親蠶祝辭屬之命婦不若歸於有司乃詔自今依先農例遣官攝事三月二十八日太常禮院言按周禮蠶於北郊以純陰也漢蠶於東郊以春桑生也晉蠶於西郊與藉田對其方也伏請約附古事築壇於東郊從

桑生之義其壇酌中用北齊之制設一壇二十五步如
淳化四年中祠禮例每季春吉日有司攝事從之遣官
擇地以聞乃飾舊九宮壇為之 一本云享先蠶者自

唐乾元三年祠於苑中是後曠絕開寶通禮季春吉已
享於公桑有司攝事景德三年二月二十一日資政殿
大學士王欽若言切以九年之儲以穀帛為本萬民之
業以農桑為先故千畝之祀王者所以勸耕民吉已之
祠王后所以率蠶婦稽往古之制皆合親行從後世之

宜亦當攝祭伏見開寶通禮郊祀錄並有親蠶祝祠蓋
由中宮未嘗親祭是以禮司缺而不舉義纂云后親饗
貴妃亞獻昭儀終獻攝事則尚宮初獻尚儀亞獻尚食
終獻臣謂屬之命婦不若歸於有司按周禮大宗伯后
不祭則攝而薦徹王后之事而宗伯得攝之農桑衣食
萬人不宜獨缺先蠶之祭皇帝遣有司享之如先農可
也詔禮官詳考攝祭故事以聞乃請於東郊擇地築壇
取漢制以春桑生之義壇高五尺方二丈四出陛陸廣

五尺一壇祀禮如中祠遣太常光祿卿奉祀祝辭以先
農為準奏可元豐四年十月詳定禮文所言唐月令注
以先蠶為天駟按先蠶之義與先農先牧先炊一也聞
元禮享先蠶為瘞罔於壇之壬地義羅曰無燔柴之儀
王涇郊祀錄載祝文曰惟神肇興蠶織則是始蠶之人
明矣今壇在東郊熙寧祀儀又有燎壇則沿襲唐月令
以為天駟誤矣周禮后蠶北郊以純陰為尊請為壇北
郊以享始蠶之人不設燎壇瘞埋以祭從之大觀四年

四月二十八日議禮局言開元禮享先蠶幣以黑請從黑以合至陰之義政和元年四月二十一日於壇側度地築公桑蠶室其親蠶殿名曰無斁宣和元年三月二十八日皇后親蠶於延福宮

於宮築採桑壇繭館織室服用鞠衣

六年閏

三月三日親蠶 太宗遊金明池召田婦數十人於

殿上賜席使坐問以民間疾苦田婦愚戇無所隱避賜帛遣之 太宗興於側微民事固無不知恐富貴而忘之也每臨朝無一日不言及稼穡 真

宗乳母秦國夫人劉氏本農家也喜言事真宗自幼聞之故為開封尹以善政著聞及踐大位咸平景德之治為有宋隆平之極景德農田勅至今稱為精當司馬光奏哲宗乞省覽農田封事

紹興宮中蠶

紹興二年四月二十四日上謂輔臣曰宮中亦自育蠶欲知女工艱難俾每事質儉五年三月甲午上曰朕令宮中養蠶庶知稼穡艱難七年五月十

一日常博黃積厚請季春吉巳日享先蠶從之十
五年閏十一月十八日太常丞王湛請於禁中行
親蠶之禮不果行 祖宗時於延春閣兩壁畫農
家蠶織甚詳元符間因改山水 六年六月丁酉
諭宰臣曰宮中親種一方稻 女執懿筐爰求柔
桑 僬僬其狀屢化如神 占之五帝 繅三盆
修六服 海人冰蠶園客絲緒 神蠶之木帝女
之林 鳴鳩醉樾之朝戴鵲降桑之日駕帷就

列鷺服斯臨 翠蓋參差翟扇容裔 荀卿楊泉有鷺
賦

觀稼 務農

禹式耦耕

大戴禮曾子制言篇昔者禹見耕者五耦而式過十室
之邑則下為秉德之士存焉 亦見荀子大畧
篇及通鑑外紀 書禹暨

稷播奏庶艱食 堯命羲仲平秩東作舜咨牧曰食哉

惟時 論語禹稷躬稼而有天下

周成王觀農事

成王親與后世子出觀農事其詩曰曾孫來止田畯至
喜又率田畯之吏使民耕作噫嘻之詩曰率時農夫播
厥百穀詩小雅甫田曾孫來止以其婦子饁彼南畝
田畯至喜箋云曾孫謂成王也田畯司嗇今之嗇夫也
成王來止謂出觀農事也親與后世子行使知稼穡之
艱難也為農人之在南畝者設饋以勸之大田曾孫
來止云云箋云成王出觀農事饋食耕者以勸之正義

成王出觀農事因即祭祀故云成王之來則又禋祀四方之神祈報焉毛以為成王親循畝畝以觀稼穡也

書周公作無逸知稼穡之艱難

注成王即政恐其逸豫故以所戒名篇

曾孫之稼如茨如梁曾孫之庾如坻如京甫既方既皁

既堅既好

大田

實穎實粟是穫是畝民生明昭上帝迄用康

年庠乃錢鏹奄觀銍艾

臣工

亦服爾耕十千維耦

噫嘻

載芟

載柞其耕澤澤千耦其耘徂隰徂畛播厥百穀實函斯

活載獲濟濟有實其積

載芟

畎畎良耜俶載南畝穫之挾

在積之粟粟

良邦

饁彼南畝田畯至喜上所以勞之也

駿發爾私終三十里言上所以勸之也 治生於敬畏

為國者每念稼穡之勞后妃不忘織紉之事則心之不
存者寡矣周公告成王見於詩有若七月皆言農桑之
候也見於書有若無逸欲其知稼穡之艱難知小人之
依也

漢文帝勸農詔

文紀二年九月詔親率羣臣農以勸之賜田租半十二

年三月詔曰朕親率天下農十年於今吾詔書數下
歲勸民種樹其賜租稅半十三年六月詔曰農有租
稅之賦勸農之道未備其除租稅後元年三月詔議
民食力田置常員親耕具禮儀其後師丹言孝文
務勸農桑帥以節儉景帝元年正月詔徙民寬大
地五月令田半租後二年四月詔親耕以奉粢盛三
年正月令郡國勸農桑

葉棘黃
金珠玉

武帝末年悔征伐

詔曰方今之務在於力農元鼎六年詔令吏民勉

農盡地利 宣帝本始四年正月詔農者興德之本

漢劭農

文紀陽朔四年春正月詔曰洪範八政以食為首先帝
劭農薄其租稅寵其強力令與孝弟同科間者民彌惰
怠鄉本者少趨末者衆將何以矯之方東作時其令二
千石勉勸農桑出入阡陌致勞來之

阡陌田間道也南北曰阡東西曰陌

蓋秦時商
鞅所開

武紀建昭五年三月詔方春農桑興是月

勞農勸民無使後時 武紀元狩三年秋遣謁者勸有

水災郡種宿麥

董仲舒說武帝詔司農使闢中民益種宿麥

後紀安帝永

初三年七月庚子詔長吏案行在所皆令種宿麥務盡地力 後循吏傳王景建初八年遷廬江太守教用犂

耕又訓令蠶織為作法制皆著於鄉亭 茨充為桂陽

教民種殖桑柘麻紵之屬勸令養蠶織屨 馬融廣成

頌宜幸廣成觀宿麥收藏

漢章帝觀收穫

紀建初七年秋九月甲戌幸偃師東涉卷津至河內詔
曰車駕行秋稼觀收穫因涉郡界皆精騎輕行無他輜
重不得輒修橋道遠離城郭遣吏逢迎刺探起居出入
前後以為煩擾動務省約但不能脫粟瓢飲耳 崔駰
西巡頌曰惟秋穀既登上將省斂平秩西成循於西郊
昔既春遊今乃秋豫 東京賦度秋豫以收成觀豐年
之多稔嘉田畯之匪懈行致賚於九扈 東平王蒼傳
永平四年春上書曰惟陛下因行田野循視稼穡弭節

而旋至秋冬乃振威靈整法駕備周衛設羽旄 南
史齊文惠太子幸東田觀獲稻范雲曰願知稼穡之
艱難無徇一朝之宴逸 文選顏延年應詔觀北湖田
收詩帝暉膺順動清蹕巡廣廕樓觀眺豐穎金駕暎松
山

唐種麥苑中

太子瑛傳帝種麥苑中

開元二十二年夏五月

太子諸王侍祭本

曰率太子以下躬自收穫帝曰是將薦宗廟故親之亦欲若等知稼

穡之艱難因分賜侍臣曰春秋書無麥禾古所甚重此
詔使者閱田畝不以實故朕自時以觀其成功 開元
十九年親耕於興慶宮龍池 劉禹錫集大和戊申大
有年詔百官觀稼詩有玉燭順成之句 白居易亦有
詩

建隆勸農詔

建隆三年正月甲戌詔曰生民在勤所寶惟穀先王明
訓也陽和在辰播種資始宜行勸誘廣務耕耘 乾德

二年正月辛巳詔曰農為政本食乃民天今土膏將起宜課東作之勤使地無遺利歲有餘糧四年閏八月乙亥詔曰百姓能廣植桑棗開荒田者只納舊租令佐能勸課種植加一階 興國七年閏

十二月庚戌詔諸道州府推擇一人練土地之宜明種植之法補為農師令相視田畝沃瘠五穀所宜至道元年六月丁酉詔民耕曠土官吏勸課書印紙十一月辛丑詔漕臣申飭 慶厯以賈昌朝

領農田 藝祖由建隆至乾德再以尺一之詔勉農
功 太宗既耕帝藉命州縣立農師教種藝 章
聖分道置使賜農田勅令又蠲農器之稅 仁廟
明道再藉弁冕舉趾進至十有二跬三公已下盡壟
乃止 神宗肇開千畝於國之南 周世宗顯德
三年留心農穡思廣勸課之道命國工刻木為耕
夫織婦蠶女之狀於禁中召近臣觀之學士承旨
陶穀為贊以美其事其序曰耕於歷山重華之德也

蠶於岐陽太似之美也我后在宥之四載以為化民成俗者莫如身率乃命有司刻木為耦人耕耘之象又為織婦蠶女之類置於紫庭亦几杖盤盂座右之義也志在足食豈同流馬之運人皆有褐且殊昆明之石同穎八蠶可翹足而望豈比獲玉鉤於山陽空有採桑之號陳金根於鉤盾但為弄田之戲哉贊曰寒耕暑織上感皇情帝梧景轉遲遲欲行宮簾風度札札有聲疲俗是念侈心不萌

乾德北郊觀稼

乾德二年七月二十三日乙未幸北郊觀稼

開寶玉津園觀刈麥 刈禾 觀稻 觀稼

開寶六年五月癸亥幸玉津園觀民刈麥八月丁亥幸

觀民刈禾

紀云
觀稼

八年四月戊辰幸觀稻九年五月庚辰

幸觀稼

太平興國幸景風門觀刈麥

太平興國三年四月二十六日庚辰駕幸景風門駐輦

觀刈麥宰臣親王節度使及吳越王劉鋹李煜皆從移
幸玉津園召從官射上中的者五張樂飲羣臣酒

太平興國南薰門觀稼

太平興國九年五月二日辛亥車駕出南薰門觀稼召
從臣列坐田中令民刈麥咸賜以錢帛

雍熙城南觀麥

雍熙二年五月二十日甲子上幸城南觀麥賜田夫布
帛有差上嘗謂近臣曰耕耘之夫最可矜閔

淳化南莊觀稼

淳化五年二月丙午

二十四日

駕幸南御莊觀稼因幸玉津

園習射張樂賜從官飲

後周顯德元年七月庚辰出

薰風門幸南御莊觀稼

淳化四年五月己亥內出麥

穗穀苗以示近臣皆長尺餘上以膏澤應期禾稼滋茂

喜形於色六月壬戌出十種秋稼苗穗示近臣皆長尺

餘至二尺

咸平玉津園觀刈麥

觀稼詩

見御詩

咸平三年五月丁丑朔幸玉津園觀刈麥賜軍士衣服
緡錢召從官射於西園之北亭上九中的又宴於別殿

四年五月壬午幸觀刈麥賜役卒衣服 五年四月

十七日壬辰幸 景德二年五月戊申幸三年五月四日

乙巳 祥符二年五月庚申幸六年四月二十五日丙

戌作觀稼詩賜近臣 天禧元年五月己亥_日二年閏

四月庚戌幸三年四月二十三日庚戌幸作觀稼五言

詩羣臣和四年五月丁巳_日並幸觀麥御製詩賜近臣

會要祥符元年五月庚申朔幸玉津園南新亭觀刈
麥先是止設帳殿於園南至是建亭以備遊幸四年五
月丁丑幸城南觀刈麥種稻 慶厯四年五月壬申幸
玉津園觀種稻

咸平含芳園觀稼

咸平四年八月壬子幸含芳園觀稼

紀云觀稼北郊宴射含芳園

景德西郊觀麥

景德三年五月乙巳幸西郊觀刈麥 祥符三年四月

辛未五年五月癸未幸城南觀刈麥遂幸玉津園宴射
作七言詩賜近臣和九年五月乙巳幸城南觀刈麥作
七言詩從臣皆和

祥符金華殿觀麥 種麥歌

真宗垂意農政嘗於金華殿種麥玉宸殿蒔稻閑暇觀
臨語左右曰見刈獲勞力愈知農耕可念食為民天可
不重邪祥符五年五月戊子遣中使以苑中金華殿所
種麥示輔臣上復作歌以賜六月辛丑上以諸王所和

觀麥歌示輔臣因曰諸王好學朕嘗誨以屬辭用事嘗
詢僚佐則免疑誤見實錄真宗遇風雨稍甚密遣人擷桑
枝禾穗觀之或無傷則喜形於色又於內殿植稻麥暇
日臨觀刈獲欲知田畝之勞

祥符蠶麥順成詩

七年五月庚戌

見御詩

祥符瑞聖園觀稼 觀稼詩

祥符六年八月辛未

十二日

瑞聖園觀稼

在景陽門外宴
即舍芳園也

從臣作郊外觀稼七言詩近臣皆和八年七月十九日
丙子再幸作觀稼五言詩天禧三年八月六日庚寅又
幸帝作觀稼七言詩近臣皆和凡三幸

祥符玉宸殿占城稻 玉宸殿瑞穀圖見御詩

祥符六年九月丁酉內出玉宸殿所種占城稻示輔臣
曰比中國稻長而無芒粒老上曰此稻耐旱不擇地頗
省民力可喻諸道廣種植之先是祥符五年五月辛未
一本遣使福建州取占城稻三萬斛分給江淮西浙三
二月

路轉運仍擇民田之高仰者分給蒔之仍出種法揭榜示民是稻即旱稻也上以三路微旱則稻不登五年閏十月丙子出玉宸殿新稻賜輔臣上曰禁中種稻暇日臨觀刈獲見其勞力愈知耕農可念也並以聖製七言詩示之

又云五年十月出玉宸殿新撰占城稻頌示輔臣

六年九月丁酉出苑

中占城稻示百官天禧二年十月十一日庚子召近臣於玉宸殿觀刈小香占城稻賜宴安福殿上作七言詩從臣和三年四月壬寅御製玉宸殿觀瑞麥七言詩賜

近臣十月壬辰召宗室近臣觀西天綠豆小香占城稻
上作七言詩三首賜之屬和四年七月辛酉詔近臣觀
內苑嘉穀宴玉宸殿十月二十九日丙午詔皇太子宗
室近臣於玉宸殿翠芳亭觀稻賜宴仍以稻分賜之

天禧玉宸殿觀麥詩

見御詩

天聖南莊觀刈麥

御莊

天聖三年五月癸巳

十二日

幸南莊觀莊觀刈麥遂幸玉津

園燕羣臣聞民舍機杼聲賜織婦茶綵五年五月乙巳九年五月丁巳幸南御莊觀刈麥射玉津園宴羣從臣

凡三
臨幸

天聖瑞聖園觀刈穀 觀稼亭燕從臣

天聖三年八月丙寅

十七日

幸瑞聖園觀稼亭觀刈穀

一作

粟

遂宴從臣六年八月癸未

一云八月丁丑

八年八月壬辰

十一

日景祐三年八月壬戌寶元二年八月丁亥康定二年

即慶厯元年

八月丁丑朔慶厯二年八月己亥

二十日

五年八

月四日丁巳皇祐元年八月乙亥日十五凡九臨幸觀稼

天聖二年九月辛卯幸太一宮還幸奉先資福院上駐

輦觀耕者遣中使慰勞賜以茶綵九年九月癸亥同

天聖元真殿觀瑞穀 藥珠殿觀稼樂

八年八月六日丁亥元真殿觀瑞穀天章閣觀三聖御書賜宴藥

珠殿宰臣以下賦詩教坊作觀稼樂酒九行罷

景祐觀稼殿觀稻麥

景祐二年五月癸巳後苑新作觀稼殿成會要云親稼殿六月

辛未幸後苑

一本十月八日召近臣後苑觀稼殿賞稻賜酒三行遂宴射太清樓觀穫稻

及賞瑞竹遂宴太清樓

又是年十月戊午三年十月戊申幸後苑寶元二年

九月丙辰召輔臣後苑翠亭觀稻慶厯六年九月乙未

召輔臣兩制後苑觀稻宴太清樓命賦詩皇祐元年八

月癸亥後苑觀粟至和元年七月戊子三年八月二日

嘉祐三年八月壬子又觀五年四月乙未觀刈麥九月

壬子觀穫稻熙寧二年八月二十八日御觀稼殿召

輔臣觀粟

自後凡六臨幸

三年五月初六日御觀稼殿召輔臣

觀麥

自後凡
四臨觀

四年十月九日後苑觀稻

自後凡
四臨觀

地理

志景祐二年建殿於後苑以觀種稻曰親稼

慶厯玉津園觀種稻

四年四月壬申幸國子監武成廟遂幸玉津園觀種稻

皇祐寶岐殿觀麥

皇祐元年五月丙午

十五日

召近臣幸後苑寶岐殿觀刈

麥謂輔臣曰朕新創此殿不欲植花卉為遊觀之所民以粒食為先而歲種麥於此庶知穡事之不易也至

和元年五月乙丑嘉祐四年五月甲午朔觀後苑有

寶岐殿仁宗遵故事觀稼於郊歲一再出又躬耕藉

田以勸天下皇祐中作寶岐殿於苑中每歲召輔臣觀

刈穀麥罕復出郊矣紹興二年四月二十四日上曰

朕聞祖宗時禁中有打麥殿今於後圃令人引水灌畦

種之亦欲知稼穡之艱月令季春為麥祈實孟夏嘗

麥先薦寢廟仲夏祈穀實

元豐觀麥視禾儀注

元豐元年五月七日召輔臣後苑觀麥

自後凡四臨觀

二年八

月六日觀穀

自後凡再觀

十月二日後苑觀稻

六年十月二日又觀

三

年十月庚辰藉田令辛公祐請於玉津園之南因舊鑿

麥殿規地十一項有奇為田引惠民河水灌之又請增

修鑿麥殿以備行幸四年八月八日時九穀皆稔藉田

司詳定官制所請講觀麥視禾儀注七年五月己亥

朔召輔臣觀麥於後苑

元祐後苑觀稼

紹聖思文殿

元祐二年十月一日三年八月丁亥七年九月八日召
輔臣觀穀稻於後苑 紹聖元年閏四月二十七日觀
麥於後苑二年五月四日三年五月九日又觀四年四
月二十一日禮官請觀麥禮畢移幸稻池綵殿以觀藝
稻二十六日上車駕幸藉田鑿麥儀注五月九日將作
監言增修鑿麥殿成詔名文思紹興十六年正月五日
有司上親耕儀注前期設御座於思文殿皇帝乘輦至
殿 宋祁皇帝幸玉津園省餽頌六氣時乘統以乾元

一游為助表乎夏諺王者法順動以省民教闢圃
游而寓稼政南直斗城外散琨苑厲儲胥長揚之
禁均郊野近蜀之富先時斥宮墺之地以收課穀
領勾盾之職因為弄田每丘麥既登原師至喜則
必按徐鑾之節歛穰之勤因見三老力田差賜百
戶束帛供帳留飲極歡而罷勤民之卹累聖為常
月惟黷賓日次東井竊扈謹九農之政貽楚告萬
箱之收天子樂由庚之得宜間大昕之夙退前除

隱樵之道右清連籟之落官以辨物儲不改供於
是洞應門引祕駕短簫鏡歌沸渭而夾引師兵弩
簾隱鱗而軍裝風清九九之塵雲彗央央之旆天
旋辰正以降於行在周原砥平漢鋪雲荷甸師清
野以獻狀畷夫滌場以作勞倬彼大田是觀鉅艾
饁於南畝遂成茨京揉耒以識帝農之來棲糧而
歌東戶之泰曩也昏作今焉柁載美恩下屬偕雲
而族颶氣相因助風之薰散遺秉為寡婦之利豐四

黼為上歲之食皇矜兌悅帝暉日潤詔環星之法
從合需天之宴慈外饗獻彘嘗之膳太師侑日舉
之奏時令先薦寢廟春秋惟重麥禾上以薦馨嘉
下以勸耘耔一出而兼二美非聖人其能哉頌曰
君之來兮吾民休徯如雲兮驟玉虬君之樂兮我
田良積如坻兮豐太倉彼都之人兮宴以喜官扈
民兮無落事自今以始兮日益寧禹躬稼兮莫我京
夏竦廣農頌景德三年春正月庚戌詔頌農田勅於天

下二月癸未詔郡國領勸農事崇化源而廣農業也先王之建國也土欲廣而不欲隙民欲衆而不欲墮地不闢非吾土也不農非吾民也乃為閭里室家以蕃其生為畝澮封畛以理其田為耒耜錢鎛以庀其器為厯象氣候以授其時立經制以御之設官司以教之均工商衡虞之稅正車馬甲兵之賦於是乎仁義禮樂有所加賞罰號令有所用三季已還五代而上有天下者或不知天下以地為基以農為本以食為源以教為器當

其撥平禍亂經始四國則衽金革簡車馬計懷柔議聚
歛賞勲舊治城邑暨邊陲既寧寓縣既平功業既成府
庫既盈則思悉華夏以自奉驅億兆以從欲有患邊幅
未濶威武未震則峙芻粟事夷狄有患歲月易逝容髮
易朽則招方士求神仙有患登覽未遠行樂未極則增
臺榭麗宮室有患嬪娛未廣歌舞未工則娛聲色選伎
藝有患校獵未快馳騁未捷則廣苑囿具畢弋有患巡
幸未徧游賞未普則修馳道飛清蹕其間自非負天啓

神授之資有聖文靈武之德者則不能訓稼穡務儲衍
致天下太康家給人足者哉頌曰皇哉惟聖躬提天柄
廣我農事肇修稼政乃置官名乃頒號令民曰勤止服
田力穡晝爾于耕宵爾無數千耦偕飛百穀咸殖既藝
淳鹵越經封湫官曰涖止糾力勸能庠我錢鎛疏我溝
塍沃野萬里縱橫其畝擁禾成林洒流降雨陽春膏原
隰如鱗我稼既華六合生雲稻粱黍稷萬井龍文同我
婦子或耨或耘八月其穫乃登爾稼滯穗棲原餘糧厭

野盈溢京庾流衍方夏

玉海卷七十七